

湖濱補讀廬林取刻

朝壻

湖觀補
讀盧菴

半園老人



序

國朝戡定西域經營締造垂二百年其時草昧初開歷朝改作之迹略而弗詳加以中夏寇亂南北兩疆大小官廨檔冊焚毀散亡蕩然掃地殆盡丙午之歲余奉命來藩新疆慨然念先朝沐櫛之勞文治武功歷時愈遠益湮沒墜失無可徵信迺招集二三博雅同志之士分纂新疆圖志收亡補遺勒爲一書當時予所手訂者凡十餘篇而實業一編典茂淵懿獨翹然而出其類久之始知其稿爲鍾笙叔孝廉所創爲笙叔以事成新疆余初見之未之奇也旣得所爲文狂喜抃舞乃益傾倒囊篋相與討論修飾益縱論古今文字得失口講指畫連日夜不少休莊

子曰逃空虛者聞人足音覓然而喜今處榛莽之世氈裘湮酪之鄉販夫之與居游卒之與伍沈寥岑寂子焉寡儔忽得笙叔其人者警歎其側其爲喜更可知也余去新疆三年矣國變而後笙叔亦北歸倉猝邂逅於燕都市上握手相語欷歔流涕已而別去不復相聞問癸丑之冬笙叔復至京以書來並輯其所爲文若干首丐序於余余觀其所作多在新疆顛沛患難之中獨抱其所學精詣猛進怡然歌嘯於蕩莽荒忽無人之墟此韓昌黎氏所謂在此不在彼者也烏虜吾烏能測其所至哉新城

王樹枏

新疆志藁目次

杭州鍾廣生孫奩甫箸

卷之一

新疆建置志序

新疆職官表序十三篇

國朝置省後官制表序

國朝置省後武營官制表序

國朝置省後旗營官制表序

國朝置省後蕃部官制表序

乾隆以來軍府舊官制表序

乾隆以來綠營舊官制表序

新編 卷之二
國朝回部舊官制表序

國朝蒙部自置屬官表序

準部故國自置屬官表序

回部故國自置屬官表序

漢唐以來建置職官表序

漢唐來以藩國受封官爵表序

西域古國自置屬官表序

新疆人物志序

卷之二

新疆實業志總叙

農田

蠶桑

森林

畜牧

漁業

礦產

工藝

商務

卷之三

新疆郵傳志總叙

驛站

自迪化西至伊犁驛程表 自迪化西北至塔爾巴哈台
驛程表 自迪化東北至巴里坤東至哈密驛程表 自
迪化東南至吐魯番東至哈密驛程表 自古城東至哈
密東南至嘉峪關驛程表 自綏來北至阿爾泰山驛程
表 自古城北至科布多驛程表 自伊犁西南至阿克
蘇驛程表 自吐魯番西南至庫車驛程表 自焉耆南
至婁羌驛程表 自庫車西至烏什驛程表 自阿克蘇
西南至莎車驛程表 自巴楚州西至喀什噶爾東南至
莎車驛程表 自莎車東至和闐驛程表 自莎車西南

至蒲犁驛程表

郵政

郵局遞發程期表

電綫

電綫表

鐵路

鐵路虛綫圖

闕

王晉卿師評職官表序十三篇云言簡意賅翔雅有度
馬通白先生評實業志全篇云仿遷固之體裁得典志
之要刪證古論今氣勢浩瀚雖杜鄭復生今日未必過

之擇言之雅猶其餘事

新疆志藁卷一

新疆建置志序

新疆東扞長城北蔽蒙古南連衛藏西倚葱嶺以爲固居神州
大陸之脊勢若高屋之建瓴得之則足以屏衛中國鞏我藩籬
不得則關隴隘其封河湟失其險一舉足而中原爲之動搖是
故漢取三十六國以斷匈奴右臂唐開西安北庭以制諸蕃元
胡崛起金山奄取西域卒滅宋金而有天下明代控馭弗及瓦
剌數寇而河套以亡此皆明效章驗而論者謬以爲天地所以
界區域絕內外不可以威服化理雖得不爲益棄不爲損斯於
形勢不亦闇乎秦以前尙已自漢以來始開遠跡而匈奴之強

弱常與西域之通塞爲終始武帝結烏孫躡大宛田輪臺渠犂
置使者校尉領護山南諸國於是北虜之勢始衰然其時漢獨
護南道猶未盡併北道也及鄭吉爲都護治烏壘城兼領北道
而匈奴迺罷僮僕都尉幕南無王庭焉光武中興天下多故未
遑外事山南君長不制於漢裂爲五十餘國永平之際匈奴脅
之共寇河西漢迺復置都護長史戊己校尉更治其地而邊境
以寧安帝即位詔罷都護遂棄西域北匈奴更收屬諸國時爲
侵寇議者欲閉玉門陽關以絕之故終漢之世歲無寧宇魏晉
以降中州俶擾鮮卑西部起山北致強大其支族豪長竊據華
夏僭閭位者數百年

慕容拓跋宇文禿髮
乞伏諸氏皆鮮卑族

北魏則有蠕蠕悅般高車後周

則有突厥鐵勒皆分據北疆迭長爭雄迄於隋季世爲邊患唐興太宗奮其武烈攘鐵勒平高昌墟薛延陀逐西突厥於伊麗河外悉定西域之地建北庭都護以監北道安西督護以監南道道各置都督府其屬曰州曰縣州有刺史縣有尉有令其戍邊之兵大曰軍小曰守捉曰城曰鎮皆有使自都督以下悉領於大都護故其時邊庭晏然烽堠無警者垂六十餘年開寶以後唐室中微西垂之地北淪回鶻南入吐蕃沙陀復起金山而承其敝逮於五季邊禍相屬宋時遼最强盛天山南北悉降於遼元起朔漠盡取塞地山北爲阿力麻里及回鶻五城諸王海都行營治軍之所山南爲別失八里諸城置宣慰司元帥府以

統之故能力征經營混壹區夏至於有明國威不振盡失瓜州以西地僅扼嘉峪關而守其後畏兀兒吐魯番諸族更盛迭衰而山北復分爲四衛拉特部雖時一朝貢特示羈縻終不能撫而有也繇是觀之中國盛則威力足以相制而疆場以安及其衰也舉邊要而捐之則往往乘中國之敝而天下卒以多事伊古以來得失之鑒灼若著龜雖有明智弗之能易已洎夫有清盛時長駕遠馭旣奠方夏悉主悉臣惟準噶爾崛起西隅負固不服歷康熙三朝之間王師載駕戈鋌所指雷徹霆摧於是一討噶爾丹再俘達瓦齊三殲阿睦爾撒納鯨鯢是翦納土歸命是爲北疆底定之始旣而回首霍集占兄弟煽衆爲亂移師

南嚮迭克名城二豎窮蹙授首荒外是爲南疆底定之始先是
準夷再平會廷臣決進止在朝議者咸以戎索之外古者弗臣
得其地不可以耕虜其人不可以使服而舍之守在四夷於義
爲便獨大學士傅恆主進取之策高宗韙之內秉乾斷外排群
議乾隆二十四年遂建總統將軍於伊犁並參贊辦事諸大臣
鎮撫之畫烏魯木齊以東地置設州縣隸於甘肅省爵回準王
公台吉世襲各有差復回部札薩克伯克各官分理回務俾鈐
束其衆繇是內外葱嶺大小十餘蕃部若哈薩克布魯特霍罕
安集延瑪爾噶朗那木干塔什干巴達克博洛爾布哈爾愛烏
罕_{即阿富汗}痕都斯坦巴勒提等咸效職納貢扶伏稱臣當此之時拓

疆萬里帶甲之士四萬歲入米粟十四萬三千餘石開屯列戍
碁置星羅蓋自漢唐以還未有若斯之盛者也咸同之際邊備
漸弛回匪金相印白彥虎等相繼爲亂安集延酋阿古柏應之
盡陷天山南北諸城俄羅斯復入踞伊犁全疆糜爛朝廷震恐
論者謂髮捻初平宜休兵息民西域阻遠非所宜急尤慮強隣
伺釁連兵不解掣動全局頗多持閉關之議者獨左宗棠力爭
不可疏言自古中國邊患西北常劇於東南顧祖禹論方隅形
勢視列代建都之地以爲輕重我朝定鼎燕京內外蒙部環衛
朔方前代九邊胥成腹地皆開新疆立軍府之所貽也是故重
新疆所以保蒙古保蒙古所以衛京師新疆不固則蒙古不安

匪特秦晉各邊時虞侵軼即直北關山將無晏眠之日況今昔
勢殊俄人拓境日廣緣邊東西萬餘里與我壤地毘連僅藉蒙
部爲之扞蔽徙薪宜遠曲突宜先臣愚以爲地不可棄兵不可
止願挈舊有之疆宇還隸職方以弭外釁固吾圉疏入報可宗
棠遣師出關盡復故所失地光緒四年迺建議開行省設郡縣
爲久遠計時以伊犁未歸不果及安酋再糾衆犯西四城宗棠
念非改省治立重鎮無以爲長治久安之本六年四月抗疏復
申前議原議設總督駐迪化設巡撫駐阿克蘇蓋深得軍民分治之意未及行而宗棠內召以通政使劉錦棠
代之七年伊犁款成俄人反我侵地八年陝甘總督譚鍾麟會
錦棠損益宗棠先後所條奏者上之於是行省之議始定以新